



**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ԳՆՈՒՄՆԵՐԻ ՀԵՏ ԿԱՊՎԱԾ ԲՈՂՈՔՆԵՐ ՔՆՆՈՂ ԱՆՁ**

ք. Երևան

25.06.2021թ.

**Ո Ր Ո Շ ՈՒ Մ
ՀՀ ԳՆՈՒՄՆԵՐԻ ՀԵՏ ԿԱՊՎԱԾ ԲՈՂՈՔՆԵՐ
ՔՆՆՈՂ ԱՆՁԻ
թիվ ՍՑ-ԼՕ-2021/141**

Նախագահությամբ՝ ՀՀ գնումների հետ կապված բողոքներ քննող անձ Լ. Օհանյանի
Քարտուղարությամբ՝ Ռ. Մկրտչյանի

Պատվիրատու՝ ՀՀ պետական եկամուտների կոմիտե
Մասնակից՝ «Արմա Թրեյդ» ՍՊԸ

Մասնակցությամբ՝
«Արմա Թրեյդ» ՍՊԸ-ի ներկայացուցիչ՝ Ա. Հակոբյանի

Գնման ընթացակարգի ծածկագիրը և առարկան՝
«ՀՀ-ՊԵԿ-ԷԱՃԱՊՁԲ-21/9-Ք» ծածկագրով էլեկտրոնային աճուրդ, տնտեսական
ապրանքների ձեռքբերում

ՀՀ գնումների հետ կապված բողոքներ քննող անձը (այսուհետ նաև՝ Բողոքներ
քննող անձ), ուսումնասիրելով Հայաստանի Հանրապետության ֆինանսների
նախարարության կողմից 27.05.2021թ.-ի թիվ 26/26-1/8547-2021 գրությամբ «Արմա Թրեյդ»
ՍՊԸ-ին (այսուհետ նաև՝ Մասնակից) գնումների գործընթացին մասնակցելու իրավունք

չունեցող մասնակիցների ցուցակում ներառելու նպատակով նախաձեռնված ընթացակարգով ներկայացված հիմքերը,

Պ Ա Ր Ձ Ե Ց

1. Գործի նախապատմությունը.

ՀՀ ֆինանսների նախարարությունը, ՀՀ պետական եկամուտների կոմիտեի 21.05.2021թ.-ի թիվ 1/18-2/30797-2021 գրության հիման վրա, 27.05.2021թ.-ին «Արմա Թրեյդ» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնել է ընթացակարգ՝ Բողոքներ քննող անձին ներկայացնելով համապատասխան հիմքեր:

Բողոքներ քննող անձին գործը մակագրվել է 27.05.2021թ.-ին:

31.05.2021թ.-ին կայացված որոշմամբ գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված ընթացակարգը ընդունվել է վարույթ, տրվել թիվ ԱՅ-ԼՕ-2021/141 համարի ծածկագիրը և նույն օրը հրապարակվել է www.gnumner.am կայքում:

04.06.2021թ.-ին և 25.06.2021թ.-ին նշանակվել և հրավիրվել են նիստեր:

Գործի քննությունն ավարտվել է 04.06.2021թ.-ին և Բողոքներ քննող անձի որոշման հրապարակման օր է նշանակվել 25.06.2021թ.-ին:

2. ՀՀ պետական եկամուտների կոմիտեի ներկայացրած փաստերը և դիրքորոշումը.

ՀՀ պետական եկամուտների կոմիտեն 21.05.2021թ.-ի թիվ 1/18-2/30797-2021 գրությամբ դիմել է ՀՀ ֆինանսների նախարարությանը՝ հայտնելով հետևյալը.

«Հայաստանի Հանրապետության պետական եկամուտների կոմիտեի կարիքների համար տնտեսական սպրանքների ձեռքբերման նպատակով ստեղծված ՀՀ-ՊԵԿ-ԷԱՃԱՊՁԲ-21/9-Ք ծածկագրով ընթացակարգին հայտ էր ներկայացրել «Արմա Թրեյդ» ՍՊԸ-ն:

Էլեկտրոնային աճուրդի միջոցով, սույն թվականի մայիսի 12-ի հանձնաժողովի նիստի համաձայն «Արմա Թրեյդ» ՍՊԸ-ի ներկայացված հայտում արձանագրվել էր անհամապատասխանություններ և վերջինիս ծանուցվել էր մեկ աշխատանքային օրվա ընթացքում շրկել անհամապատասխանությունները: Սակայն «Արմա Թրեյդ» ՍՊԸ-ի կողմից, սահմանված ժամկետում, շրկված փաստաթղթերը էլեկտրոնային աճուրդ համակարգում չեն կցվել:

Հիմք ընդունելով “Գնումների մասին” ՀՀ կառավարության 04.05.2017թ. թիվ 526-Ն որոշման 42-րդ կետը, սույն թվականի մայիսի 14-ի հանձնաժողովի նիստի համաձայն «Արմա Թրեյդ» ՍՊԸ-ի կողմից ներկայացված հայտը մերժվել է:»:

Ելնելով վերոգրյալից և հիմք ընդունելով ՀՀ կառավարության 04.05.2017թ.-ի թիվ 526-Ն որոշմամբ հաստատված գնումների գործընթացի կազմակերպման կարգի 45-րդ կետի պահանջները, կից ներկայացվել է «ՀՀ-ՊԵԿ-ԷԱՃԱՊՁԲ-21/9-Ք» ծածկագրով հայտարարված գնման ընթացակարգի շրջանակներում «Արմա Թրեյդ» ՍՊԸ-ի տվյալները՝ համապատասխան հիմքերով:

3. «Արմա Թրեյդ» ՍՊԸ-ի ներկայացրած փաստարկները և դիրքորոշումը.

Բողոքներ քննող անձը 31.05.2021թ.-ին գրությամբ դիմել է «Արմա Թրեյդ» ՍՊԸ-ին՝ հնարավորություն տալով ՀՀ ֆինանսների նախարարության կողմից 27.05.2021թ.-ի թիվ 26/26-1/8547-2021 գրությամբ նախաձեռնված ընթացակարգի վերաբերյալ ներկայացնել գրավոր կարծիք:

Մասնակիցը ստանալով կարծիք հայտնելու վերաբերյալ գրությունը, ինչպես նաև ծանուցված լինելով նիստի տեղի, օրվա և ժամի մասին, ներկայացել է 04.06.2021թ.-ին հրավիրված նիստին:

Մասնակիցը 01.06.2021թ.-ին ներկայացնելով գրավոր դիրքորոշում՝ հայտնել է հետևյալը.

«ՀՀ պետական եկամուտների կոմիտեի կարիքների համար՝ «տնտեսական ապրանքների» ձեռքբերման նպատակով ՀՀ-ՊԵԿ-ԷԱՃԱՊՁԲ-21/9-Ք ծածկագրով հայտարարված էլեկտրոնային աճուրդի ընթացակարգին մասնակցության հակադարձ աճուրդի ավարտի հայտերի հիման վրա 11.05.2021թ. հարթող մասնակից ճանաչվեց 1,2,5,6 չափաբաժիտների մասով Արմա Թրեյդ ՍՊԸ-ն:

12.05.2021թ. առաջարկվեց 1 աշխատանքային օրվա ընթացքում ներկայացրած հայտով տեխնիկական բնութագրերը շտկել:

13.05.2021թ Արմա Թրեյդ ՍՊԸ-ի կողմից ուղղարկվել է շտկումը պատվիրատուի հրավերում նշված էլ. հասցեին այսինքն մենք չենք արհամարհել, չենք շրջանցել պատվիրատուի կողմից նշված պահանջը, միևնույն ժամանակ էլ. հասցեին ավտոմատ ծանուցմամբ մեզ նշված նամակով ասվում էր, որ կարող ենք հասնել շտկման էջին հղումով, սակայն հղումը տանում էր մրցույթային էջ, որտեղ մեր աշխատակիցը չգտնելով ներբեռնելու հնարավոր տարբերակը ուղղարկել է պատվիրատուի էլ. հասցեին փորձելով գոնե տվյալ տարբերակով կատարել պահանջը:

18.05.2021թ. մեզ ավտոմատ ծանուցմամբ ծանուցվեց, որ հայտերը մերժվել են, քանի որ շտկված փաստաթղթերը էլեկտրոնային աճուրդ համակարգում չեն կցվել:

Ընկերությունն առաջին անգամ է մասնակցում էլեկտրոնային աճուրդի և eauction.armeps.am համակարգի նրբություններին չտիրապետելու հետևանքով թույլ է տվել տեխնիկական սխալ:

Ըստ էության, թերությունների վերացման առաջարկի ընկերության կողմից թերի կատարման մեջ բացակայում է վերջինիս գնումների գործընթացին մասնակցություն չունեցող մասնակիցների ցանկում ներառելու հանգամանքը, քանզի վերջինս ձեռնարկել է իրենից կախված բոլոր միջոցառումները արձանագրված թերությունները շտկելու և գնման գործընթացի շրջանակներում իր ստանձնած պարտավորությունները պատշաճ կատարելու համար:

Քննող անձի ուշադրությունն են հրավիրում հետևյալ հանգամանքի վրա.

1. Պատվիրատուն գրությամբ դիմել է ՀՀ ֆինանսների նախարարություն, մի գրություն որում բացակայում է գիմումի հերթական համարը և ամիս-ամսաթիվը:

2. Արմա Թրեյդ ՍՊԸ-ն 2014թ-ից մինչ օրս մասնակցել է տասնյակ մրցույթների և ապահովել պայմանագրերով նախատեսված պարտավորությունների պատշաճ կատարումը, ստանալով դրական եզրակացություններ մատուցած ապրանքների վերաբերյալ:

3. Արմա Թրեյդ ՍՊԸ-ն չի շրջանցել օրենքը, նախատեսված ժամկետում ուղղարկել է շտկումը պատվիրատուին:»:

Ելնելով վերոգրյալից՝ «Արմա Թրեյդ» ՍՊԸ-ն Բողոքներ քննող անձին խնդրել է «Արմա Թրեյդ» ՍՊԸ-ին տալ հնարավորություն շարունակելու մասնակցել հետագա պետական մրցույթներին:

4. ՍՑ-LO-2021/141 ընթացակարգի քննության համար էական նշանակություն ունեցող փաստերը.

Սույն գործի քննության համար էական նշանակություն ունեցող փաստերի համաձայն՝

i. ՀՀ պետական եկամուտների կոմիտեի (այսուհետ նաև՝ Պատվիրատու) կողմից տնտեսական ապրանքների ձեռքբերման նպատակով 29.04.2021թ.-ին հայտարարվել է «ՀՀ-ՊԵԿ-ԷԱՃԱՊՁԲ-21/9-Ք» ծածկագրով էլեկտրոնային աճուրդ (այսուհետ նաև՝ Ընթացակարգ):

ii. Ընթացակարգին մասնակցելու նպատակով 1-ին, 2-րդ, 5-րդ և 6-րդ չափաբաժինների մասով հայտ է ներկայացրել նաև «Արմա Թրեյդ» ՍՊԸ-ն:

iii. Մասնակիցը մասնակցության հայտի թիվ 1 հավելվածով՝ գնման ընթացակարգին մասնակցելու դիմում-հայտարարությամբ, հայտարարել և հավաստել է, որ բավարարում է «ՀՀ-ՊԵԿ-ԷԱՃԱՊՁԲ-21/9-Ք» ծածկագրով գնման ընթացակարգի հրավերով սահմանված մասնակցության իրավունքի պահանջներին և հրավերի պահանջներին համապատասխան ներկայացնում է հայտ՝ կից ներկայացնելով առաջարկվող ապրանքի ամբողջական նկարագիրը՝ համաձայն թիվ 1.1 հավելվածի:

iv. Ընթացակարգի գնահատող հանձնաժողովի (այսուհետ նաև՝ Հանձնաժողով) 12.05.2021թ.-ին կայացված նիստի թիվ 2 արձանագրության 3-րդ կետի համաձայն՝ «Արմա Թրեյդ» ՍՊԸ-ի կողմից ներկայացված հայտում առաջարկվող ապրանքի տեխնիկական բնութագրերը հստակ չեն նկարագրված: Մասնավորապես՝ տեխնիկական բնութագրում հստակեցված չէ միջակայքերը, առկա են «նվազագույն» և «առավելագույն» տերմինները, որոնք առաջարկվող կոնկրետ ապրանքի նկարագրություն չեն կարող լինել:

v. Նույն արձանագրության 4-րդ կետի համաձայն՝ Հանձնաժողովը որոշել է մեկ /1/ աշխատանքային օրով կասեցնել հայտերի գնահատման նիստը և ծանուցել «Արմա Թրեյդ» ՍՊԸ-ին առաջարկելով մինչև կասեցման ժամկետի ավարտը շտկել արձանագրված անհամապատասխանությունները:

vi. Հանձնաժողովի քարտուղարի կողմից 12.05.2021թ.-ին noreplay@eauction.armeps.am համակարգի միջոցով անհամապատասխանությունների

շտկման վերաբերյալ նույնաբովանդակ ծանուցում է ուղարկվել Մասնակցի էլ. փոստի հասցեին:

vii. Հանձնաժողովի 14.05.2021թ.-ի նիստի թիվ 3 արձանագրության համաձայն՝ «Արմա Թրեյդ» ՍՊԸ-ի կողմից, ծանուցմամբ սահմանված ժամկետում, շտկված փաստաթղթերը էլեկտրոնային աճուրդ համակարգում չեն կցվել:

viii. Նույն արձանագրության համաձայն՝ Հանձնաժողովը, ղեկավարվելով ՀՀ կառավարության 04.05.2017թ.-ի թիվ 526-Ն որոշմամբ հաստատված «Գնումների գործընթացի կազմակերպման» կարգի 42-րդ կետով, որոշել է Մասնակցի հայտը մերժել:

ix. Ընթացակարգի հրավերի թիվ 1 հավելվածով 1-ին, 2-րդ, 5-րդ և 6-րդ չափաբաժինների մասով սահմանված տեխնիկական բնութագրերի համաձայն պահանջվել է հետևյալը.

1-ին չափաբաժին՝ Տեսակը-տանձաձև, Հզորությունը-12-14 Վտ, Լարումը-220Վ-240Վ միջակայքով աշխատող, Լուսաշողի հոսքը-900-1200 ԼՄ, Լուսաշողի ջերմաստիճանը-3800-4200 Կ Լամպի բնիկը-E27 Աշխատանքային ժամանակահատվածը-նվազագույնը 28000 ժամ Չափսերը-տրամագիծը առավելագույնը 65մմ, բարձրությունը առավելագույնը 115մմ Երաշխիքային ժամկետը-365 օրացույցային օր: Այլ պայմաններ՝ Ապրանքը պետք է լինի չօգտագործված: Ապրանքի տեղափոխումը և բեռնաթափումը իրականացնում է Մատակարարը իր միջոցներով և իր հաշվին: Գնումների մասնակցության իրավունքը և որակավորման չափանիշները՝ համաձայն գործող օրենսդրության:

2-րդ չափաբաժին՝ Տեսակը-տանձաձև Հզորությունը-12-14 Վտ Լարումը-220Վ-240Վ միջակայքով աշխատող Լուսաշողի հոսքը-900-1200 ԼՄ Լուսաշողի ջերմաստիճանը-3800-4200 Կ Լամպի բնիկը-E27 Աշխատանքային ժամանակահատվածը-նվազագույնը 28000 ժամ Չափսերը-տրամագիծը առավելագույնը 65մմ, բարձրությունը առավելագույնը 115մմ Երաշխիքային ժամկետը-365 օրացույցային օր: Այլ պայմաններ՝ Ապրանքը պետք է լինի չօգտագործված: Ապրանքի տեղափոխումը և բեռնաթափումը իրականացնում է Մատակարարը իր միջոցներով և իր հաշվին: Գնումների մասնակցության իրավունքը և որակավորման չափանիշները՝ համաձայն գործող օրենսդրության:

5-րդ չափաբաժին՝ Լեդ լույս երկակի լամպով Լամպերի տեսակը-լեդ / խողովակաձև Լուսատուի տեսակը-արտաքին տեղադրվող /քանոնաձև /պատին կամ առաստաղին ամրանալու հնարավորությամբ Հզորությունը-երկու լամպը միասին նվազագույնը 36վտ Լարումը-170Վ-240Վ Գույնի ջերմաստիճանը-3600-4000 Կ Պաշտպանվածության

աստիճանը-նվազագույնը՝ IP20 Աշխատանքային ժամանակահատվածը-նվազագույնը 25000 ժամ Երկարությունը 1200մմ/1215մմ / Լայնությունը 100մմ-ից 130մմ / Կաղապարը-պլաստիկ կամ մետաղական /գույնը-սպիտակ/ Երաշխիքային ժամկետը-365 օրացույցային օր: Այլ պայմաններ՝ Ապրանքը պետք է լինի չօգտագործված: Ապրանքի տեղափոխումը և բեռնաթափումը իրականացնում է Մատակարարը իր միջոցներով և իր հաշվին: Գնումների մասնակցության իրավունքը և որակավորման չափանիշները՝ համաձայն գործող օրենսդրության:

6-րդ չափաբաժին՝ Լեդ լույս երկակի լամպով Լամպերի տեսակը-լեդ /խողովակաձև Լուսատուի տեսակը-արտաքին տեղադրվող /քանոնաձև /պատին կամ առաստաղին ամրանալու հնարավորությամբ Հզորությունը-երկու լամպը միասին նվազագույնը 20վտ Լարումը-170վ-240վ Գույնի ջերմաստիճանը-3600-4000 Կ Պաշտպանվածության աստիճանը-նվազագույնը՝ IP20 Աշխատանքային ժամանակահատվածը-նվազագույնը 25000 ժամ Երկարությունը 590մմ/600մմ/ Լայնությունը 100մմ-ից 130մմ /Կաղապարը-պլաստիկ կամ մետաղական /գույնը-սպիտակ/ Երաշխիքային ժամկետը-365 օրացույցային օր: Այլ պայմաններ՝ Ապրանքը պետք է լինի չօգտագործված: Ապրանքի տեղափոխումը և բեռնաթափումը իրականացնում է Մատակարարը իր միջոցներով և իր հաշվին: Գնումների մասնակցության իրավունքը և որակավորման չափանիշները՝ համաձայն գործող օրենսդրության:

x. Մասնակցի կողմից թիվ 1.1 հավելվածով առաջարկվող ապրանքի տեխնիկական բնութագրերով 1-ին, 2-րդ, 5-րդ և 6-րդ չափաբաժինների համար ներկայացվել է ամբողջությամբ նույն բնութագրերը, ինչը նախատեսված է մրցույթի հրավերով:

5. Բողոքներ քննող անձի հիմնավորումները և եզրահանգումը.

Բողոքներ քննող անձը լրիվ, օբյեկտիվ և բազմակողմանի հետազոտելով և գնահատելով սույն գործում առկա ապացույցները, և համադրելով դրանք գործով պարզված փաստական հանգամանքների հետ, հանգում է այն եզրակացության, որ ՀՀ ֆինանսների նախարարության կողմից 27.05.2021թ.-ի թիվ 26/26-1/8547-2021 գրությամբ «Արմա Թրեյդ» ՍՊԸ-ին գնումների գործընթացին մասնակցելու իրավունք չունեցող մասնակիցների

ցուցակում ներառելու նպատակով նախաձեռնված ընթացակարգն ենթակա է մերժման, հետևյալ պատճառաբանությամբ.

«Գնումների մասին» ՀՀ օրենքի (այսուհետ նաև՝ Օրենք) 30-րդ հոդվածի 1-ին մասի համաձայն՝ մասնակիցը հայտը ներկայացնում է հրավերով սահմանված կարգով: Հայտը ներառում է մասնակցի հաստատած՝

1) հրավերի պահանջներին իր տվյալների համապատասխանության մասին հայտարարությունը.

2) գնային առաջարկը.

3) ոչ գնային առաջարկը (տեխնիկական առաջարկ կամ տեխնիկական բնութագիր), եթե հրավերով նախատեսված է:

4) հրավերով նախատեսված այլ փաստաթղթեր (տեղեկություններ):

Օրենքի 34-րդ հոդվածի 1-ին մասի համաձայն՝ հայտերը գնահատվում են հրավերով սահմանված կարգով: Բավարար են գնահատվում հրավերով նախատեսված պայմաններին համապատասխանող հայտերը, հակառակ դեպքում հայտերը գնահատվում են անբավարար և մերժվում են:

ՀՀ կառավարության 18.05.2017թ.-ի թիվ 534-Ն որոշմամբ հաստատված «Գնումների գործընթացի կազմակերպման» կարգի 10-րդ կետի համաձայն՝ էլեկտրոնային աճուրդով գնումների կատարման և ընտրված մասնակցի հետ պայմանագրի կնքման ժամանակ գործում են Հայաստանի Հանրապետության կառավարության 2017 թվականի մայիսի 4-ի թիվ 526-Ն որոշման 1-ին կետի 1-ին ենթակետով հաստատված կարգով նախատեսված կարգավորումները...:

ՀՀ կառավարության 04.05.2017թ.-ի թիվ 526-Ն որոշմամբ հաստատված «Գնումների գործընթացի կազմակերպման» կարգի (այսուհետ նաև՝ Կարգ) 32-րդ կետի 1-ին ենթակետի «գ» պարբերության համաձայն՝ հրավերով նախատեսվում է նաև, որ մասնակիցը հայտով ներկայացնում է ապրանքների գնման դեպքում իր կողմից առաջարկվող ապրանքի տեխնիկական բնութագրերը, իսկ հրավերով նախատեսված դեպքերում նաև առաջարկվող ապրանքի ապրանքային նշանը, ֆիրմային անվանումը, մակնիշը և արտադրողի անվանումը (այսուհետ՝ ապրանքի ամբողջական նկարագիր):

Նույն կետի 21-րդ ենթակետի համաձայն՝ հայտերի գնահատումն իրականացվում է դրանց ներկայացման վերջնաժամկետը լրանալու օրվանից հաշված տասն աշխատանքային օրվա ընթացքում: Եթե գնման ընթացակարգի չափաբաժինների քանակը

գերազանցում է յոթանասունհինգ չափաբաժինը, ապա հայտերի գնահատումն իրականացվում է դրանց ներկայացման վերջնաժամկետը լրանալու օրվանից հաշված տասնհինգ աշխատանքային օրվա ընթացքում:

Կարգի 40-րդ կետի 4-րդ ենթակետի համաձայն՝ հայտերի բացման և գնահատման նիստում հանձնաժողովը մերժում է այն հայտերը, որոնցում բացակայում է գնային առաջարկը, կամ եթե այն ներկայացված է հրավերի պահանջներին անհամապատասխան, բացառությամբ սույն կարգի 41-րդ կետով նախատեսված դեպքի:

Կարգի 41-րդ կետի համաձայն՝ եթե հայտերի բացման և գնահատման նիստի ընթացքում իրականացված գնահատման արդյունքում մասնակցի հայտում արձանագրվում են անհամապատասխանություններ՝ հրավերի պահանջների նկատմամբ ներառյալ այն դեպքերը, երբ հայտում ներառված՝ Հայաստանի Հանրապետության ռեզիդենտ հանդիսացող մասնակցի կողմից հաստատված փաստաթղթերը կամ դրանց մի մասը հաստատված չեն էլեկտրոնային թվային ստորագրությամբ, ապա հանձնաժողովը մեկ աշխատանքային օրով կասեցնում է նիստը, իսկ հանձնաժողովի քարտուղարը նույն օրը դրա մասին էլեկտրոնային եղանակով ծանուցում է մասնակցին՝ առաջարկելով մինչև կասեցման ժամկետի ավարտը շտկել անհամապատասխանությունը:

Կարգի 42-րդ կետի համաձայն՝ եթե սույն կարգի 41-րդ կետով սահմանված ժամկետում մասնակիցը շտկում է արձանագրված անհամապատասխանությունը, ապա նրա հայտը գնահատվում է բավարար: Հակառակ դեպքում տվյալ մասնակցի հայտը գնահատվում է անբավարար և մերժվում է, ներառյալ եթե մասնակիցը սույն կարգի 32-րդ կետի 1-ին մասի «ե» պարբերությամբ սահմանված ժամկետում չի ներկայացնում հայտի ապահովման բնօրինակը, իսկ ընտրված մասնակից է ճանաչվում հաջորդող տեղ զբաղեցրած մասնակիցը:

ՀՀ պետական եկամուտների կոմիտեի կողմից տնտեսական ապրանքների ձեռքբերման նպատակով 31.03.2021թ.-ին հայտարարված «ՀՀ-ՊԵԿ-ԷԱՃԱՊՁԲ-21/9-Ք» ծածկագրով էլեկտրոնային աճուրդի հրավերի (այսուհետ նաև՝ Հրավեր) 8.11-րդ կետի համաձայն՝ առաջին տեղը զբաղեցրած մասնակցի հայտի գնահատման արդյունքում սույն հրավերի պահանջների նկատմամբ անհամապատասխանություններ արձանագրելու դեպքում, ներառյալ երբ ՀՀ ռեզիդենտ հանդիսանալու պայմաններում մասնակցի կողմից հայտով ներկայացված փաստաթղթերը կամ դրանց մի մասը հաստատված չեն էլեկտրոնային թվային ստորագրությամբ, հանձնաժողովը մեկ աշխատանքային օրով

կասեցնում է նիստը, իսկ հանձնաժողովի քարտուղարը նույն օրը դրա մասին համակարգի միջոցով ծանուցում է մասնակցին՝ առաջարկելով մինչև կասեցման ժամկետի ավարտը շտկել անհամապատասխանությունը: Առաջին տեղը զբաղեցրած մասնակցին ուղարկվող ծանուցման մեջ մանրամասն նկարագրվում են հայտի գնահատման ընթացքում հայտնաբերված բոլոր անհամապատասխանությունները:

Եթե սույն կետով սահմանված ժամկետում առաջին տեղը զբաղեցրած մասնակիցը համակարգի միջոցով շտկում է արձանագրված անհամապատասխանությունը, ապա վերջինիս հայտը գնահատվում է բավարար և մասնակիցը հայտարարվում է ընտրված մասնակից: Հակառակ դեպքում հայտը գնահատվում է անբավարար և մերժվում, ներառյալ եթե սույն հրավերով նախատեսված է հայտի ապահովման ներկայացման պահանջ և առաջին տեղը զբաղեցրած մասնակիցը հայտով ապահովումը ներկայացրել է բանկային երաշխիքի ձևով, սակայն սույն հրավերով սահմանված ժամկետում չի ներկայացրել դրա բնօրինակը:

Վերոգրյալ իրավակարգավորումների լույսի ներքո, Բողոքներ քննող անձը փաստում է, որ մասնակիցը ներկայացնում է հրավերով սահմանված կարգով հայտ, որը ներառում է մասնակցի կողմից ներկայացված դիմում-հայտարարությունը, առաջարկվող ապրանքի ամբողջական նկարագիրը, հրավերով նախատեսված այլ փաստաթղթեր (տեղեկություններ): Կարգի 41-րդ և Հրավերի 8.11-րդ կետերով սահմանվում են այն դեպքերը, երբ հանձնաժողովը մեկ աշխատանքային օրով կասեցնում է նիստը, իսկ հանձնաժողովի քարտուղարը նույն օրը դրա մասին էլեկտրոնային եղանակով տեղեկացնում է մասնակցին՝ առաջարկելով մինչև կասեցման ժամկետի ավարտը շտկել անհամապատասխանությունը:

Հայտերի գնահատումն իրականացվում է հրավերով սահմանված կարգով և հրավերով նախատեսված պայմաններին չհամապատասխանող հայտերը գնահատվում են անբավարար և մերժվում են, ներառյալ եթե հրավերով նախատեսված է հայտի ապահովման ներկայացման պահանջ և առաջին տեղը զբաղեցրած մասնակիցը հայտով ապահովումը ներկայացրել է բանկային երաշխիքի ձևով, սակայն սույն հրավերով սահմանված ժամկետում չի ներկայացրել դրա բնօրինակը:

Բողոքներ քննող անձը հարկ է համարում նշել, որ օրենսդիրն իմպերատիվ կերպով սահմանել է, որ եթե հայտերի բացման և գնահատման նիստի ընթացքում իրականացված գնահատման արդյունքում մասնակցի հայտում արձանագրվում են անհամապատասխա-

նություններ՝ հրավերի պահանջների նկատմամբ, ապա հանձնաժողովը մեկ աշխատանքային օրով կասեցնում է նիստը, իսկ հանձնաժողովի քարտուղարը նույն օրը դրա մասին էլեկտրոնային եղանակով ծանուցում է մասնակցին՝ առաջարկելով մինչև կասեցման ժամկետի ավարտը շտկել անհամապատասխանությունը:

Սույն գործի փաստերի համաձայն՝ ՀՀ պետական եկամուտների կոմիտեի կողմից տնտեսական ապրանքների ձեռքբերման նպատակով 29.04.2021թ.-ին հայտարարված «ՀՀ-ՊԵԿ-ԷԱՃԱՊՁԲ-21/9-Ք» ծածկագրով էլեկտրոնային աճուրդին մասնակցելու նպատակով 1-ին, 2-րդ, 5-րդ և 6-րդ չափաբաժինների մասով հայտ ներկայացրած «Արմա Թրեյդ» ՍՊԸ-ի հայտում Հանձնաժողովի 12.05.2021թ.-ին կայացված նիստի թիվ 2 արձանագրության 3-րդ կետով արձանագրվել է, որ առաջարկվող ապրանքի տեխնիկական բնութագրերը հստակ չեն նկարագրված: Մասնավորապես՝ տեխնիկական բնութագրում հստակեցված չէ միջակայքերը, առկա են «նվազագույն» և «առավելագույն» տերմինները, որոնք առաջարկվող կոնկրետ ապրանքի նկարագրություն չեն կարող լինել, ինչով պայմանավորված որոշում է կայացվել մեկ /1/ աշխատանքային օրով կասեցնել հայտերի գնահատման նիստը և ծանուցել «Արմա Թրեյդ» ՍՊԸ-ին առաջարկելով մինչև կասեցման ժամկետի ավարտը շտկել արձանագրված անհամապատասխանությունները, ինչի մասին Հանձնաժողովի քարտուղարի կողմից 12.05.2021թ.-ին noreplay@eauction.armeps.am համակարգի միջոցով անհամապատասխանությունների շտկման վերաբերյալ նույնաբովանդակ ծանուցում է ուղարկվել Մասնակցի էլ. փոստի հասցեին: Սակայն Հանձնաժողովի 14.05.2021թ.-ի նիստի թիվ 3 արձանագրությամբ արձանագրվել է, որ «Արմա Թրեյդ» ՍՊԸ-ի կողմից, ծանուցմամբ սահմանված ժամկետում, շտկված փաստաթղթերը էլեկտրոնային աճուրդ համակարգում չեն կցվել, ինչով պայմանավորված Հանձնաժողովը որոշել է Մասնակցի հայտը մերժել:

Վերոնշյալ իրավական նորմերի և փաստական հանգամանքների հիման, դրանք համադրելով Մասնակցի ներկայացրած դիրքորոշման հանգամանքներին՝ Բողոքներ քննող անձն արձանագրում է, որ Կարգի 41-րդ կետն ուղղակիորեն սահմանում է և այդ կետի իմաստից բխում է, որ հայտում ներառվող փաստաթղթերում արձանագրված՝ շտկման ենթակա անհամապատասխանություններն ենթակա են շտկման՝ հանձնաժողովի քարտուղարի կողմից Մասնակցին էլեկտրոնային եղանակով ուղարկված ծանուցման ստացման պահից հաշված մեկ աշխատանքային օրյա ժամկետում:

Բողոքներ քննող անձը հարկ է համարում հավելվել նաև, որ ստանձնած պարտավորությունների (այդ թվում՝ ընթացակարգի և պայմանագրի) խախտման հիմքերը պայմանականորեն կարելի է բաժանել երկու խմբի՝ օբյեկտիվ և սուբյեկտիվ: Օբյեկտիվ հիմքերի մեջ կարելի է դասել ֆորսմաժորային դեպքերը՝ տարերային աղետները, ինչպես նաև արտակարգ իրավիճակը և նմանատիպ այլ՝ անձանց կամքից անկախ հիմքերով առաջացող պատճառները: Սուբյեկտիվ գործոնը պայմանավորված է անմիջականորեն տվյալ անձի հետ կապված և գործնականում ավելի երկար ժամանակ պահանջող ողջամիտ խնդիրների լուծմամբ, առանց որի անհնար է ստանձնած պարտավորությունների կատարումը:

Բողոքներ քննող անձն արձանագրում է, որ բոլոր դեպքերում էլ, բացի ֆորսմաժորային իրավիճակներից, ստանձնած պարտավորությունների խախտման համար մեղքի բացակայության փաստը հաստատված համարելու համար ընդհանուր կանոնն այն է, որ անձը պարտավոր է ապացուցել, որ օրենքով սահմանված պարտավորությունների կատարման համար անհրաժեշտ ժամկետի ընթացքում ձեռնարկել է իրենից կախված ողջամիտ ու բավարար միջոցներ այդ պարտավորությունների պատշաճ կատարումն իրականացնելու ուղղությամբ, սակայն իր կամքից անկախ պատճառներով խախտել է գնման ընթացակարգով կամ պայմանագրով ստանձնած պարտավորությունը(ները): Օբյեկտիվ և սուբյեկտիվ հիմքերի վերաբերյալ նմանատիպ դիրքորոշում է հայտնել ՀՀ վճռաբեկ դատարանն իր նախկինում կայացրած որոշումներում (*տե՛ս*, «Հայբիզնեսբանկ» ՓԲԸ-ն ընդդեմ «Միլլար» ՍՊԸ-ի թիվ ԵԿԴ/2628/02/13 քաղաքացիական գործով ՀՀ վճռաբեկ դատարանի 03.12.2014 թվականի որոշումը):

Օրենսդիրը, արձանագրված անհամապատասխանությունների շտկում ներկայացնելու պարտականության կատարման համար սահմանելով այդպիսի պահանջ ստանալու պահից հաշված 1 աշխատանքային օրյա ժամկետ, գնման գործընթացի մասնակիցներին ընձեռել է այն օբյեկտիվ ժամանակահատվածը, երբ վերջիններս կարող են իրացնել Օրենքով և Կարգով սահմանված՝ արձանագրված անհամապատասխանությունների շտկելու պարտավորությունը: Ուստի սահմանված պատասխանատվության միջոցները կարող են ի հայտ գալ միայն սահմանված ժամկետի ավարտմամբ կամ մասնակցի կողմից այնպիսի գործողություններ կատարելու արդյունքում, որոնք վկայում են վերջինիս կողմից արձանագրված անհամապատասխանությունները շտկելուց հրաժարվելու մասին:

Բողոքներ քննող անձը հարկ է համարում փաստել, որ Կարգի 41-րդ և Հրավերի 8.11-րդ կետերի դրույթները իմպերատիվ (պարտադիր) կերպով սահմանում են հանձնաժողովի քարտուղարի գործողությունները, որոնք պետք է իրականացվեն մասնակցի հայտում արձանագրված անհամապատասխանությունների դեպքում, այն է՝ հանձնաժողովի քարտուղարը նույն օրը անհամապատասխանությունների մասին էլեկտրոնային եղանակով ծանուցում է մասնակցին՝ առաջարկելով մինչև կասեցման ժամկետի ավարտը շտկել անհամապատասխանությունը, ինչպես նաև մասնակցին ուղարկվող ծանուցման մեջ մանրամասն նկարագրվում են հայտնաբերված անհամապատասխանությունները:

Բողոքներ քննող անձը հարկ է համարում փաստել, որ Օրենքի 34-րդ հոդվածի և Կարգի 41-րդ կետի դրույթների իմաստից բխում է, որ մասնակցի ներկայացրած հայտը գնահատվում է բավարար այն դեպքում, երբ այն համապատասխանում է հրավերով նախատեսված պայմաններին:

Հարկ է նկատել նաև, որ Կարգի 41-րդ և Հրավերի 8.9-րդ կետերի դրույթների վրա հասնելու (կիրառելու) հանգամանքը գործադիրը պայմանավորել է հրավերի պահանջների նկատմամբ մասնակցի հայտում արձանագրված անհամապատասխանությունների հանգամանքով: Այլ կերպ ասած՝ նախ անհրաժեշտ է արձանագրել անհամապատասխանություն, ապա դրանից հետո նոր առաջարկել կատարելու շտկում:

Բողոքներ քննող անձը հարկ է համարում փաստել, որ Պատվիրատուն և Հանձնաժողովը գնման գործընթացի մասնակիցների հայտերի գնահատումն իրականացնելիս չպետք է վերջիններին ծանրաբեռնեն այնպիսի պարտականություններով, որոնք ուղղված են ձևական պահանջների պահպանմանը, կամ, առավել ևս, մերժեն ներկայացված հայտերը, եթե մասնակիցների վրա դրված պարտականությունները բովանդակային առումով կատարված են:

Ինչպես Օրենքի իմաստից է բխում, որ գնման գործընթացի շրջանակներում ներկայացված հայտերի գնահատումը պետք է ուղղված լինի Հայաստանի Հանրապետության Սահմանադրությամբ և օրենքներով հետապնդվող նպատակին, և դրան հասնելու միջոցները պետք է լինեն պիտանի, անհրաժեշտ և չափավոր:

Վերոնշյալով պայմանավորված՝ Բողոքներ քննող անձն արձանագրում է, որ ՀՀ պետական եկամուտների կոմիտեի կողմից տնտեսական ապրանքների ձեռքբերման նպատակով հայտարարված «ՀՀ-ՊԵԿ-ԷԱՃԱՊՁԲ-21/9-Բ» ծածկագրով էլեկտրոնային աճուրդի գնահատող հանձնաժողովի կողմից Մասնակցի հայտի թիվ 1.1 հավելվածում

արձանագրելով անհամապատասխանություններ գործել է ոչ իրավաչափ, քանի որ Ընթացակարգի հրավերի թիվ 1 հավելվածով 1-ին, 2-րդ, 5-րդ և 6-րդ չափաբաժինների մասով սահմանված տեխնիկական բնութագրերի և Մասնակցի կողմից թիվ 1.1 հավելվածով առաջարկվող ապրանքի տեխնիկական բնութագրերի ուսումնասիրության արդյունքում պարզ է դառնում, որ «Արմա Թրեյդ» ՍՊԸ-ի կողմից 1-ին, 2-րդ, 5-րդ և 6-րդ չափաբաժինների համար ներկայացվել է ամբողջությամբ նույն բնութագրերը, ինչը նախատեսված է Ընթացակարգի հրավերով, ուստի Հանձնաժողովի կողմից Մասնակցի հայտում անհամապատասխանությունները շտկելու մասին և դրա արդյունքում վերջինիս հայտը մերժելու մասին կայացված որոշումները չեն բխում Կարգի 41-րդ և Հրավերի 8.11-րդ կետերի դրույթներից:

Օրենքի 6-րդ հոդվածի 1-ին մասի 6-րդ ենթակետի համաձայն՝ գնումների ընթացակարգերին մասնակցելու իրավունք չունեն այն անձինք՝ որոնք հայտը ներկայացնելու օրվա դրությամբ ներառված են գնումների գործընթացին մասնակցելու իրավունք չունեցող մասնակիցների ցուցակում: Մասնակիցն ընդգրկվում է նշված ցուցակում, եթե՝

ա. խախտել է պայմանագրով նախատեսված կամ գնման գործընթացի շրջանակում ստանձնած պարտավորությունը, որը հանգեցրել է պատվիրատուի կողմից պայմանագրի միակողմանի լուծմանը կամ գնման գործընթացին տվյալ մասնակցի հետագա մասնակցության դադարեցմանը,

բ. որպես ընտրված մասնակից հրաժարվել է պայմանագիր կնքելուց,

գ. հայտերը բացելուց հետո հրաժարվել է գնման գործընթացին հետագա մասնակցությունից:

Նույն հոդվածի 2-րդ մասի համաձայն՝ գնումների գործընթացին մասնակցելու իրավունքից զրկված մասնակցի վերաբերյալ ունեցած տեղեկությունների հիման վրա լիազորված մարմինը ընթացակարգ է նախաձեռնում: Տվյալ մասնակցի կարծիքը լսելուց հետո գնումների հետ կապված բողոքներ քննող անձը նույն օրենքի 50-րդ հոդվածի 6-րդ մասով սահմանված ժամկետում որոշում է կայացնում մասնակցին նույն հոդվածով նախատեսված ցուցակում ընդգրկելու վերաբերյալ: Անձը նշված ցուցակում ընդգրկվում է երկու տարի ժամկետով:

Կարգի 32-րդ կետի 19-րդ ենթակետի համաձայն՝ հրավերով նախատեսվում է նաև, որ եթե մասնակցի՝ հրավերով նախատեսված գնումներին մասնակցելու իրավունք

ունենալու մասին հավաստումը որակվում է որպես իրականությանը չհամապատասխանող, կամ մասնակիցը հրավերով սահմանված կարգով և ժամկետներում չի ներկայացնում հրավերով նախատեսված փաստաթղթերը կամ ընտրված մասնակիցը չի ներկայացնում որակավորման ապահովումը, ապա այդ հանգամանքը համարվում է որպես գնման գործընթացի շրջանակում ստանձնված պարտավորության խախտում:

Կարգի 45-րդ կետի համաձայն՝ «Գնումների մասին» ՀՀ օրենքի 6-րդ հոդվածի 1-ին մասի 6-րդ կետով նախատեսված հիմքերն ի հայտ գալու օրվան հաջորդող հինգ աշխատանքային օրվա ընթացքում պատվիրատուն տվյալ մասնակցի տվյալները՝ համապատասխան հիմքերով, գրավոր ուղարկում է լիազորված մարմին, որը դրանք ստանալուն հաջորդող 5 աշխատանքային օրվա ընթացքում նախաձեռնում է տվյալ մասնակցին գնումների գործընթացին մասնակցելու իրավունք չունեցող մասնակիցների ցուցակում ներառելու ընթացակարգ:

Նշված իրավանորմերի վերլուծությունից պետք է փաստել, որ օրենսդիրը մասնակցին գնումների գործընթացին մասնակցելու իրավունք չունեցող մասնակիցների ցուցակում ներառելու համար նախատեսել է սպառիչ պայմաններ, որոնք են պայմանագրով նախատեսված կամ գնման գործընթացի շրջանակում ստանձնած պարտավորությունների խախտումը, որը հանգեցրել է պատվիրատուի կողմից պայմանագրի միակողմանի լուծմանը կամ գնման գործընթացին տվյալ մասնակցի հետագա մասնակցության դադարեցմանը, որպես ընտրված մասնակից պայմանագիր կնքելուց հրաժարվելը և հայտերը բացելուց հետո գնման գործընթացին հետագա մասնակցությունից հրաժարվելը: Միայն սույն դեպքերում է հնարավոր մասնակցին ներառել գնումների գործընթացին մասնակցելու իրավունք չունեցող մասնակիցների ցուցակում:

Վերոնշյալներով իրավական և փաստական հանգամանքերի հաշվառմամբ, Բողոքներ քննող անձը գալիս է այն եզրահանգման, որ «Գնումների մասին» ՀՀ օրենքի 6-րդ հոդվածի 1-ին մասի 6-րդ կետի «ա» ենթակետի դրույթների կիրառման անխուսափելիությունն առաջանում է այն ժամանակ, երբ Մասնակիցն իր գործողություններով կամ անգործությամբ, խախտում է գնման գործընթացի շրջանակում ստանձնած պարտավորությունը, որն էլ հանգեցնում է Պատվիրատուի կողմից գնման գործընթացին տվյալ մասնակցի հետագա մասնակցության դադարեցմանը: Սույն գործում առկա փաստերով չի հիմնավորվում, որ Մասնակցի կողմից խախտվել է գնման գործընթացի շրջանակում ստանձնած որևէ պարտավորություն, որն էլ կհանգեցնեք Օրենքի

6-րդ հոդվածի 1-ին մասի 6-րդ ենթակետի «ա» պարբերությամբ սահմանված դրույթների կիրառմանը:

Այսպիսով, վերոհիշյալ փաստական հանգամանքների և իրավական նորմերի լույսի ներքո, դրանց համակարգված վերլուծության արդյունքում՝ Բողոքներ քննող անձը հանգում է այն եզրակացության, որ «Գնումների մասին» ՀՀ օրենքի 6-րդ հոդվածի 1-ին մասի 6-րդ կետի «ա» ենթակետում նշված պատասխանատվությունը չի կարող վրա հասնել ու հանգեցնել «Արմա Թրեյդ» ՍՊԸ-ին՝ գնումների գործընթացին մասնակցելու իրավունք չունեցող մասնակիցների ցուցակում ընդգրկելուն:

Ելնելով վերոգրյալից և ղեկավարվելով «Գնումների մասին» ՀՀ օրենքի 50-րդ հոդվածի 7-րդ մասով՝ ՀՀ գնումների հետ կապված բողոքներ քննող անձը՝

Ո Ր Ո Շ Ե Ց

ՀՀ ֆինանսների նախարարության կողմից 27.05.2021թ.-ի թիվ 26/26-1/8547-2021 գրությամբ «Արմա Թրեյդ» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված ՍՑ-ԼՕ-2021/141 ծածկագրով ընթացակարգը մերժել:

ՀՀ գնումների հետ կապված բողոքներ քննող անձի ընդունած որոշումն ուժի մեջ է մտնում այն տեղեկագրում հրապարակելուն հաջորդող օրը:

ՀՀ գնումների հետ կապված բողոքներ քննող անձի ընդունած որոշումն իրավապարտադիր է, որը կարող է փոփոխվել կամ վերացվել, այդ թվում՝ մասնակի, միայն դատարանի կողմից:

**ՀՀ ԳՆՈՒՄՆԵՐԻ ՀԵՏ ԿԱՊՎԱԾ
ԲՈՂՈՔՆԵՐ ՔՆՆՈՂ ԱՆԶ՝**



ԼԵՎՈՆ ՕՇԱՆՅԱՆ